


An Pagbiling Han

Pinakamabaysay Nga Daraga



Hadton una nga panahon, may-ada usa nga lalaki nga may maupay ngan dagko an lawas. Pero hambugon hiya ngan dako an pagbilib han iya kalugaringon. Karuyag niya maka-asawa hin pinakamabaysay nga daraga.

Usa kaadlaw, samtang nangangahoy hiya ha kagugub-an, napansin niya an usa nga daraga nga natukdaw ha butnga han parang, ha sapit han puno nga talisay. Naakit hiya ha maamo niya nga nawong, mahamis nga panit ngan mainggat an buhok nga kolor bulawan.

“Ikaw na an pinakamabaysay nga daraga nga nahikit-an ko ha akon bug-os nga kinabuhi.” sering niya ha iya kalugaringon samtang tiharani ha daraga.

Pero tigda la ini nawara. Kinalasan hiya ngan nalisang.

“Maanyag nga daraga, pagpakita daw!” pero waray nabaton.

Dara nga karuyag gud niya mahikilal-an an daraga, ginlinibot niya an kabukiran. Pero waray niya kahikit-i an daraga.

Ha sobra nga butlaw ngan kaurit, nakaguliat hiya.
“Hoy daraga, ikaw na an pinakamaraot nga babayi nga
akon nahikit-an.

Nahipalingkod hiya ha ilarum han puno han talisay
ngan nahingaturog.


Namurawpuraw hiya han kahamot han haropoy
han hangin. Han pagpukrat niya nakit-an niya
ha kapaw-an an maamo nga nawong
han usa nga daraga.

“Hambog nga lalaki, kararaot
hanimoginbuhat! Imogin pasiparaan
an akon kahuyayag. Amo ito an
angay hit mga tawo nga tamayan.”
Ngan dida nahipausa nga naglilinupad-
lupad na hiya. Usa na ngayan hiya nga
mananap.

“Mawawara la ito nga
sumpa kon madadara mo ha
akon an pinakamabaysay
nga daraga ha iyo
kalibutan.

Tikang hadto, dara-
dara an usa nga lampara,
naglilini-bot-libot hiya bisan diin para
mamiling han pinakamabaysay nga daraga.

“Pasensiya, waray ako nahikit-an han akon
paglakaton.” Mahinay nga tingug niya han pakabalik
ha atubangan han puno. Ngan padayon an





iya pagpinamiling han pinakamabaysay nga daraga
nga dara-dara an iya lampara.

Tikang hadto, hikikit-an an mga bukatkat nga
nagsisinalimpaparay ha mga magrampag nga puno nga
baga-baga han may-ada ginkikinasuwerte o ginbibiniling
ha katutnga han gab-i.